



## **Oahppoplána - Jo3 čoarve-, dákte- ja metálladuodjefága**

Sámediggi mearridan láhkaásahussan 04.05.2021, láhkavuodđu: suoidnemánu 17.b 1998 nr 61 láhka vuodđoskuvlla ja joatkkaoahpahusa birra (oahpahusláhka) § 6-4 nubbe lađas. Gusto 01.08.2022

Oahppoplánakoda: HMD03-02

Gusto 01.08.2022 rájes

# Oahppoplána - Jo3 čoarve-, dákte- ja metálladuodjefága

Oahppoplánakoda: HMD03-02

## Fága birra

### Fága relevánsa ja guovddáš árvvut

Jo3 čoarve-, dákte- ja metálladuodjefágas lea sáhka sámi árbevirolaš atnudujiid duddjomis, divvumis ja ođasteamis. Go praktihkalaččat bargá čorvviiguin, dávttiiguin, metálaiiguin ja eará ávdnasiiguin ja go geavaha iešguđet reaiduid ja heivvolaš mašiinnaid, de ovdánahttet oahpahallit duddjongálggaid ja ipmárdusa duoji árbevierus, hámis ja teknikkas. Oahpahallit galget suokkardit, ovdánahttit ideaid ja geavahit innovatiiva proseassaid ráhkadit ođđa atnudujiid. Duodjefága galgá oahpahalliid ráhkkanahhttit dustet servodaga gálvojearu árbevirolaš ja ođđaovdánahttojuvvon buktagiidda. Duodjefága galgá sihkkarastit ahte šaddet oahppan duojárat geat máhttet árbevirolaš duoji ja geat gehččet ovddasguvlui ja hutket dujiid main álgoálbmotmáhttu lea vuodđun.

Buot fágat galget leat mielde duohtandahkame oahpahusa árvovuoddu. Jo3 čoarve-, dákte- ja metálladuodjefága galgá leat mielde ovddideamen fágalaš identitehta ja hutkanilu, ja áddejumi norpmaide, etihkkii ja estehtalaš albmanahhtimiidda duojs. Bargadettiin fágain ovdánahttet oahpahallit máhtu sámi luonddu- ja kulturárbbi girjáivuodas ja variašuvnnain. Máhttu árbevieruin galgá váikkuhit dasa ahte oahpahallit ožžot áktejumi lundui ja áddejumi ahte resurssageavaheamis lea dárbu luondduriggodagaid gáhttet boahtevaš buolvvaide. Fága galgá leat mielde máhtu addimin bargoaddi ja bargi geatnegasvuodaid ja vuoigatvuodaid ja golmma bealát ovttasbarggu mávssolašvuoda birra, mas bargoaddi, bargi ja eiseválddit barget ovttas ovdánahttit buori bargoeallima.

## Guovddášelemeanttat

### Ávnnaváalljen ja kulturárbi

Guovddášelemeanttas ávnnaváalljen ja kulturárbi lea sáhka háhkat ja válljet heivvolaš ávdnasiid čoarve-, dákte ja metálladuodjái, reidet ja vurkkodit árbevirolaš vuogi mielde. Dasto lea vel guovddášelemeanttas sáhka das movt sámi kulturárbi lea čatnasan sámegeaileide ja árbevieruide symbolageavaheamis, ornamentihkka hábmemis ja dan geavaheamis.

## **Duodji, reaiddut ja mašiinnat**

Guovddášelemeanttas duodji, reaiddut ja mašiinnat lea sáhka geavahit iešguđet giehtaduodjeteknikkaid ja duddjot čorvviiguin, dávttiiguin, metállaiguin ja eará ávdnasiiguin. Lea sáhka ipmirdit ávdnasiid iešguđetlágan iešvuođaid ja válljet ja geavahit iešguđet reaidduid ja mašiinnaid barggu ektui. Guovddášelemeanttas lea maid sáhka bargat gustovaš dearvvašvuođa, birrasa ja sihkkarvuođa njuolggadusaid mielde, ja galgá leat dáhpin duodjelanjas geavahit suodjalanbiergasiid, dáhtábláđiid ja geavahanbagadusaid ja válljet vuogas rumašbarganvugiid barggadettiin.

## **Designenproseassat**

Guovddášelemeanttas designenproseassat lea sáhka ovdánahttit ideaid, plánet, čađahit ja dokumenteret barggu mas ovdánahtta duodjebuktagiid čoarvvis, dávttis ja metállas. Guovddášelemeanttas lea vel sáhka das ahte geavahit hámi, funkšuvnna, ivnniid, ávdnasiid ja innovašuvnna designenproseassas. Suokkardemiin metodaid, albmanahttinvugiid ja iešguđet árbevieruid galget oahpahallit viidáset ovdánahttit ja duddjot ođđa dujiid.

## **Gávpemárkanipmárdus**

Guovddášelemeanttas gávpemárkanipmárdus lea sáhka goluin ja sisaboađuin iežas buvttadeamis. Lea maid sáhka iežas bargguid ovdanbuktit ja bagadit ostiid iešguđet oktavuodain. Guovddášelemeanttas lea maid sáhka mearkagálvohukseamis ja duoji iešvuođaid ja kultuvrralaš- ja árbevirolaš árvvu gaskkusteames. Dasa gullá maid geavahit fága kulturhistorjá barggustis. Márkanfievrrredeapmi ja iežas giehtadujiid ja bálvalusaid vuovdin iešguđet fierpmádagaid bokte lea oassin guovddášelemeanttas.

## **Fágaidrasttideaddji fáttát**

### **Álbmotdearvvasvuohta ja eallimis birgen**

Jo3 čoarve-, dákte- ja metálladuodjefágas lea sáhka fágaidrasttideaddji fáttas álbmotdearvvasvuohta ja eallimis birgen das ahte ovdánahttit giehtagálggaid, buriid bargorutiinnaid ja válljet vuogas ja rumašbarganvugiid ja geavahit reaidduid ja mašiinnaid riehta barggadettiin. De lea maid dán fágas sáhka ovdánahttit ja nannet identitehta hábmeniluin, máhttimiin, nákcet čoavdit čuolmmaid ja dahkat jierpmálaš válljemiid iežas eallimis. Dása gullá maid ovdánahttit iešluohttámuša ja duostat albmanahttit oaiviliid. Fágaidrasttideaddji fádda álbmotdearvvasvuohta ja eallimis birgen lea maid mielde čalmmustahttime movt duodji iešguđet ládje čájeha joavkogullevašvuođa.

### **Guoddevaš ovdáneapmi**

Jo3 čoarve-, dákte- ja metálladuodjefágas lea fágaidrasttideaddji fáttas guoddevaš ovdáneapmi mearkkaša kritihkalaččat reflekeret ja leat dihtomielalaš etihkalaš ja birrasa beliid ektui go háhka ávdnasiid ja muđui buvttadanproseassas. Lea maid sáhka das ahte ipmirdit, árvvoštallat ja máhttit geavahit ođđaáigásaš teknologija duodjebuvttadeamis. De lea maid sáhka ovdánahttit geavatlaš ja nanu árbevirolaš ja ođđamállet dujiid main lea buorre kvalitehta, maid sáhtta mátasdoallat, ođđasit geavahit ja divvut. Guoddevaš ovdáneapmi mearkkaša maid ahte fága lea mielde sihkkarastimis máilmmi luonddu- ja kulturárbbi.

### **Vuodđogálggat**

### **Njálmmálaš gálggat**

Njálmmálaš gálggat jo3 čoarve-, dákte- ja metálladuodjefágas mearkkaša ahte geavahit fágagiela ja mitalit buktagiid birra ja gulahallat njálmmálaččat ostiiguin, bargoustibiiguin, gálvolágideddjiiguin, árbevierroguddiiguin ja eará ovttasbargoguimmiiguin. Oahpahallit ovdánahttet njálmmálaš gálggaid go ságaskuššet, reflekterejit ja presenterejit buktagiid ja metodaidda ja gaskkustit oaviliiddiset fágalaš digaštallamiin.

## **Máhttit čállit**

Máhttit čállit jo3 čoarve-, dákte- ja metálladuodjefágas mearkkaša máhttit čálalaččat albmanahttit, ráhkadit minstariid, bargotevnegeid ja válddahemiid. De maid mearkkaša presenteret ja dokumenteret bargoproseassaid teavsttain ja visualiseremiin ostiide, bargoustibiidda, gálvolágideddjiide ja eará ovttasbargoguimmiide. Dasa gullá vel suokkardit ja reflekteret fágalaš fáttáid ja čuolmmaid, ráhkadit ákkastallamiid ja dárkkistit iežas teavsttaid.

## **Máhttit lohkat**

Máhttit lohkat jo3 čoarve-, dákte- ja metálladuodjefágas mearkkaša gávdnat dieđuid fágagirjjálašvuodas, iešguđet teavsttain, bargobagadusain, sárgumiin, symbolain, govain ja illustrašuvnnain. Dasa gullá maid buohtastahttit, dulkot dieđuid ja oažžut fágalaš jurddabohtosiid oahpes ja amas fágačállosiin. De vel gullá dasa gálduid geavahit kritihkalaččat ja luohtehahtti vugiin.

## **Máhttit rehkenastit**

Máhttit rehkenastit jo3 čoarve-, dákte- ja metálladuodjefágas mearkkaša rehkenastit deattu, ráhkadit minstariid ja meroštít ávnnas- ja áigegeavaheami. Dasa gullá maid dahkat ekonomalaš meroštemiid go ráhkada haddefálaldagaid fitnodaga ja iežas buktagiidda ja bálvalusaide.

## **Digitála gálggat**

Digitála gálggat jo3 čoarve-, dákte- ja metálladuodjefágas mearkkaša viežžat ja gaskkustit dieđuid ja visualiseret ideaid. Dat mearkkaša maid bargat buvttaovdánahttimiin ja designemiin, gollomeroštemiin ja iežas duodjebuktagiid ja bálvalusaid márkastimiin. Digitála gálggaid gullá árvvoštallat, bargat ja buohtalastit dieđuid, leahkit gáldokritihkalaš ja čujuhit gálduid. Dasa gullá maid ovdánahttit etihkalaš dihtomielalašvuoda, čájehit digitála árvvoštallannávcca ja čuovvut njuolggadusaid ja norpmaid.

# **Gealbomihttomearit ja árvvoštallan**

## **Gealbomihttomearit ja árvvoštallan čoarve-, dákte ja metálladuodjefága**

### **Gealbomihttomearit**

Oahpahusa mihttomearri lea ahte oahpahalli galgá máhttit

- plánet, čađahit, árvvoštallat ja dokumenteret iežas bargguid ja bargoproseassaid ja geavahit fágaterminologija barggus
- suokkardit sámi árbevierromáhttu ja álgoálbmotkultuvra ja geavahit inspirašuvdnan ehtalaš vugiin iežas hutkkálaš barggus ja go gaskkusta duoji

- geavahit digitála resurssaid ovdánahttit bargotevnnegiid, sárggastusaid ja modeallaid ja geavahit daid duddjomis go hábme ođđa čoarve-, dákte- ja metállabuktagiid trendaid ja ođđa albmanahttiimiid vuodul
- selvehit duodjeárbevieruid Sámis ja ráhkadit iežas guovllu dahje muhtin eará Sámi guovllu árbevirolaš duodjebuktagiid
- válljet ávdnasiid, reidet ja vurkkodit daid árbevirolaš ja ođđa vugiid mielde ja válddahit funkšuvnna, kvalitehta ja bistima
- duddjot ja gárvet árbevirolaš atnu- ja ođđamállet dujiid čoarvvis, dávttis ja metállas
- hábmet ja ráhkadit ja buktagiid sahemiin, čuohppamiin ja jurssahemiin
- geavahit relevánta metodaidda gos geavaha silbba ovttas čorvviin ja dávttiin duddjot činaid ja eará buktagiid, ja selvehit movt presišuvdna ja dárkilvuotta barggadettiin váikkuha bohtosii
- geahččaladdat iešguđetlágan oktiibidjan- ja laktinvugiid, árvvoštallat daid ja geavahit daid iežas barggus
- geavahit iešguđet vugiid buoššudit ja devkkodahttit ja hábmet stáli niibbebuvttadeapmái hábmet, vadjat ja goarrut leairaniibedohta
- hábmet, vadjat ja goarrut leairaniibedohta
- hervet graveremin, čuohppamiin ja deaddimin ávdnasiid ja dujiid
- geavahit iešguđetlágan teknihkaid, pusset ja livttisin dahkat ja dikšut olggožiid iešguđet ávdnasiin ja buktagiin
- meroštít ávnnas- ja buvttadangoluid iežas dujiin ja bálvalusain ja árvvoštallat ávnnasgeavaheami, produktivitehta ja gánnáheami oktavuođaid
- geavahit iešguđet digitála resurssaid go márkanfievrrida ja vuovdá iežas ja fitnodaga mearkagálvvuid ja gulahallamis ostiiguin ja eará ovttasbargoguimmiiguin
- selvehit sámi čoarve-, dákte- ja metálladuoji historjjá ja iešvuoda ja geavahit historjjálaš gálduid referánsan buktagiid buvttadeamis ja rekonstrueremis luohtehahtti vugiin
- šliipet, heidnet, poleret, geavahit ja mátasdoallat ávjoreaidduid
- geavahit ja mátasdoallat mašinnaid, reaidduid ja duodjebiergasiid gustovaš dearvvašvuoda, birrasa ja sihkarvuodanjuolggadusaid mielde
- geavahit heivvolaš suodjalanbiergasiid ja buriid bargorutiinnaid ja válljet vuogas barganvugiid maid rievdadallá barggadettiin vai garvá noadđevigiid
- suokkardit iešguđet sámi duodjeorganisašuvnnaid ja -ásahusaid doaibmasuorggi ja barggu, ja movt atnit ávkki dain, ja maid reflekeret makkár rolla dain lea servodagas

- bargat gustovaš njuolggadusortnegiid ja šiehtadusaid vuodul mat regulerejit bargodili, ja válddahit bargoaddi ja bargi geatnegasvuodaid ja vuoigatvuodaid

## **Dađistaga árvvoštallan**

Dađistaga árvvoštallan galgá leat mielde oahppama ovddideamen ja ovdánahttimin gealbbu. Oahpahallit čájehit ja ovdánahttet gealbbu jo3 čoarve-, dákte- ja metálladuodjefágas go geavahit máhtu, gálggaid ja kritihkalaš jurddašeami go galget bargobihitáid čoavdit. Bagadeaddji galgá láchččit dili vai oahpahallis lea mielváikkuheapmi ja oahppanmovtta oalgguhit iešguđetlágan bargguid bokte. Bagadalli ja oahpahalli galgaba ságastallat oahpahalli ovdáneami birra jo3 čoarve-, dákte- ja metálladuodjefágas. Oahpahallit galget beassat mitalit maid orrot máhttimin, ja beassat reflekteret iežaset fágalaš ovdáneamis. Bagadeaddji galgá bagadallat viidáset oahppama birra ja heivehit oahpahusa nu ahte oahpahallit sáhttet geavahit bagadusa loktet iežaset gealbbu fágas.

## **Árvvoštallanortnet**

### **Loahppaárvvoštallan**

Ovdal fágageahččaleami galget buohkat geat eai leat čuvvon dábálaš oahppomannolaga, leat ceavzán čálalaš eksámena mii lea ráhkaduvvon fága oahppoplána vuodul. Eksámen ráhkaduvvo guovddáš ásašusain ja sensurerejuvvo báikkálaččat. Eksámenis ii galgga leat ráhkkananoassi.

Oahpahus jo3 čoarve-, dákte- ja metálladuodjefágas galgá loahpahuvvot fágageahččalemiin. Buohkat galget čađahit fágageahččaleami, mii galgá čađahuvvot unnimusat guđa árgabeaivvi sisa.